

Concierto di Musica di Folklore ABC y exposicion "Aruba di Antao"

DEN cuadro di celebracion di 10 aña di existencia di Fundacion Mi Cutisa (FMC), lo organisa dia 14 y 15 di maart 2015 un Concierto di Musica di Folklore ABC y un exposicion "Aruba di Antao". E exposicion lo ta alabes habri riba 18 di maart, durante un Feria Cultural cu lo bay tuma luga na Cas di Cultura, for di 10:00 di mainta te cu 4:00 di atardi.

Den e celebracion aki lo presenta un concierto cu musica di folklore di e tres islanan di habla Papiamentu di Caribe Hulandes. Tambe ta e intencion pa trece tres cantante reconoci di e islanan ABC hunto, esta Ced Ride di Corsou, Wesley St. Jago di Boneiro y Jossy Brokke di Aruba. Pa prome biaha na Aruba tur tres cantante lo bay presenta e musica di folklore cu tur tres e islanan tin en comun, esta nos wals, tumba, mazurka etc.

Carchinan pa e Concierto por wordo cumpra na Nature's Discount na Noord, Seroe Blanco y Pos Chikito y na Valero Boulevard. FMC ta encurasha un y tur pa cumpra nan ticket trempan pa no perde e concierto aki.

Ced Ride lo presenta hunto cu su banda tipico Folklore, Wesley St. Jago cu su banda Sabor Crioyo y Johnny Scharbaay hunto cu algun otro musician di Aruba lo compaña Jossy Brokke. Tur esaki pa un prijs simbolico di Afl. 55 pa ticket.

Den e anochi aki, e pueblo di Aruba ta haya oportunidad, pa prome bes den historia, pa aprecia e musica di folklore cada isla den un solo concierto. E toke special di e concierto aki ta cu e musica di folklore di nos islanan lo keda presenta "den un bachi nobo", cu instrumentonan adicional, areglonan nobo

y composicionnan nobo.

Banda di e Concierto di Folklore ABC, FMC ta organisa un exposicion pa laga e publico mira con nos hendenan tabata decora nan cas antes na Aruba y ki mueble y artefactonan tabata uza pa haci esaki. Lo presenta cada parti di e cas den forma di un "Show Case" y e instalacion aki lo fungi tambe pa e publico por saca potret bisti den trahenan tipico di Aruba, cu lo por huur dia 18 di maart na Cas di Cultura.

Varios organisacion cu ta traha riba tereno di cultura lo uni Dia di Himno y Bandera pa presenta nan mes na e pueblo di Aruba paden y pafo di Cas di Cultura. Na e Feria Cultural aki lo bay tin bendemento di boca dushi, cuminda crioyo, mata, buki y mucho mas.

Tambe lo bay tin declamacion di poesia, presentacion di musica y exposicion di algun instrumento cu ta traha na Aruba mes. Entre otro algun bari di steelpan cu sr. Mario Lacle, miho conoci como Mai Lac a traha y e lo duna un demostracion con ta traha steelpan, 11.00 di mainta.

E evento aki lo ta alabes un fundraising pa FMC por manda e grupo di Aruba na e concierto ABC cu lo tuma luga e aña aki na luna di juli na Boneiro y tambe na november na Corsou.

